

Q. D. B. V.

DUODENUM MULTORUM MA- LORUM SEDEM,

RECTORE MAGNIFICENTISSIMO

D. N. PHILIPPO WILHELMO,
PRINCIPE BORUSSIAE, MARCHIONE BRANDEN-
BURG. CETERA,

P R Æ S I D E

FRIDERICO HOFFMANNO,

CONSILIARIO ET ARCHIATRO REGIO,
MED. PROF. PUBL. h. t. DECANO,

Summos in salutari professione honores
petiturus

DISSERTATIONE INAUGURALI
adferebat

d. Januarii MDCCVIII.

JOANNES DANIEL ENGMANN,
Gryphenb. Silesius.

Typis CHRISTOPH. ANDREÆ ZEITLERI, Acad. Typogr.

VIRO
PRÆNOBILISSIMO, AMPLISSIMO NEC NON
EXPERIENTISSIMO

DOMINO,
MELCHIORI
SÜSSEBACHIO,

MEDICINÆ DOCTORI FAMIGERA-
TISSIMO ET PRACTICO HIRSCHBERGEN-
SI FELICISSIMO,

*Disertationem hanc in signum
venerationis*

D. D. D.

JOHANNES DANIEL ENGMANNUS.

VIR PRÆNOBILISSIME.



Nvaluit consuetudo, qua specimen eruditionis quaecunque edituri, Patrono cui-dam illud inscribant, cujus præsidio & malevolorum injurias eo felicius evitare & bonorum favorem promptius acquirere possint. Cum enim quilibet de se ipso iudicium facillime ferat, aut nimis tumidum, aut valde timidum, propria ingenii confessione innotescere velle, periculosa apprimè res est: omnium verò promiscuæ judicandi libidini sese exponere, temeritatem quandam arguere videtur. Recte igitur tota res unius arbitrio committitur, cujus in iudicando promptitudo non minus ac æquitas perspecta sit. Hæc dum cogito, præsentem hanc Dissertationem, cui inscribam, digniorem pariter ac æquiorem præter Te invenio neminem. Ea enim in rebus medicis polles experientia, ut nihil inter Medicos hætenus disputatum esse persua-

sus sim, quin propriis in Praxi observationibus illud vel stabilire vel refutare solus posse videaris. Eo etiam judicandi acumine emines, ut tota Silesia tuam in dijudicandis morbis exquirendisque & applicandis congruis medicaminibus promptitudinem admiretur. Ea denique præditus es animi dexteritate, ut ignotis atque notis absque ullo proprii commodi aucupio dextre consulere non graveris. Noli itaque levidenses has pagellas incluto Tuo Nomini consecratas adeo averfari, quin easdem justissimo tuo iudicio subicias, meque contra malignorum temerarias calumnias autoritate tua protegendum suscipias. Totus in eo ero, ut eximium, quem demereri non valeo favorem, quo debeo cultu, prosequar, nullo unquam tempore mandatis tuis, si quidem iisdem memet dignari visum fuerit, defuturus. Vale & fave

PRÆNOBILISSIMI TUI NOMINIS

Observantissimo Cultori

J. D. ENGMANNO



PROOEMIUM.



Ene omnino antiquiores medicorum tradiderunt, in curationibus morborum plurimum sibi vindicare sollertem causarum morbum continentium notitiam. Neque falso quidem ita proposuerunt, siquidem & morborum cura non alia ratione perficitur, quam ut eorundem causæ recte explorentur, exploratæque remediis auxiliisque expugnentur. Ideoque unice adnitendum est medico, cui cordi quidem ægrorum valetudo est, ut, qua fieri potest solertia, cujusvis mali causam inquiret, & cognita causa domicilium sedemque ejus diligenter persequatur. Debet tamen antiquissima cura ejus, qui rationalem medicinam profitetur, esse, ut initia causarum, ex quibus morbi fiunt, earundemque generationem recte intelligat, quippe experientia compertum est, ea, quæ corporis nostri actiones lædunt, neque simul neque semel provenire, sed sensim paulatimque progenerari, & accedente tempore sua capere incrementa. Cujus quidem rei consideratio plurimum utilitatis præstat, quippe cujus beneficio aper-

te edocemur, qua ratione causæ morbum machinantes in abditis corporis partibus efformentur. Quare omnino non inutilem operam nos posituros arbitramur, si huic contemplationi tam necessariæ paucis inmoremur. Et primum ita sentimus, sanguinem ceterosque humores, quibus corpus adfunditur, quamdiu hisce suus motus per corporis tubulos constat, adeo non causam vel occasionem morbis dare, ut corpus potius ab iisdem unice defendat atque tueatur. Atque inde necessarium omnino est, ut quodcunque corpori inimicum infestumque est, quod ejus actiones lædit ac perturbat, & quod perniciem molitur valetudini, id ipsum quidem extra vitale sanguinis flumen positum sit, velut purgamentum quoddam à puro ejus fonte rejectum. Et sicut hic quidem circulus, quamdiu salvus incolumisque persistit, causa omnino vitæ recte salutatur, ita hæc ipla extinguatur, hoc motu intercepto. Quod argumento esse potest, illos humores, qui suo motu i. e. circulari progressivo per corpus feruntur, salutare sanitati esse, & recte vitales adpellari, quod hisce vita maxime sustineatur. Sicut contra iidem, ubi in motu langvescunt & in quiete constituti sunt, extra vitalem sanguinis motum positi, malum minantur corpori, omni opera eliminandi. Atque hæc ratio est, cur, titulus causarum morbos excitantium his recte tribuatur, utpote satis constat, nihil hisce præsentius, nihil paratius morbos creare. Jamque in confesso est ratio, cur iis maxime in locis, ubi stagnationi moræque humorum occasio datur, quærenda sit sedes causarum, quæ sæcundo sinu morbos producant. Quo nomine in primis celebrantur sic dictæ primæ viæ, quarum nomine non ventriculus tantum, sed totum etiam inte-

intestinatorum canalem designamus. Mirum est, quam fecundus morbis sit hic canalis, quam infesta morborum agmina inde emissa reliquum corpus divexent. Cujus quidem rei rationem exigenti facile dari hæc potest, quod tardior ibi sit fluidorum motus, quam in vasorum systemate. Porro ex anatomica contemplatione scimus, ex universo corpore ibi confluere diversorum humorum colluviem, à sangvinis circulo, velut alienam atque inconvenientem, eliminatam, ex hepate vero in primis, pancreate & glandulis copiosos succos hic descendere. Accedit, quod ubi motus peristalticus, quo hæc partes sustentur, langvescit, quod ex variis causis accidere potest, ad stagnationem & quæ hanc sequuntur mala, latissima via aperiatur. Quare cordatiores medici in omni fere morbo primarum viarum rationem esse habendam adfirmant, quando extra omnem dubitationem positum sit, plurima ibi mala eaque gravissima sedem suam defixisse. Ad hæc & ipsa remedia, quibus labascenti valetudini succurrimus, virtutem suam ibi maxime ostendunt, quippe validissima auxilia, quibus pertinacissimos morbos expugnamus, salutarem suum effectum vix ultra primas vias extendunt. Quod manifesto probant emetica & purgantia, valentissima medicamentorum, nequid dicam de absorbentibus, acidis, nitrosis & salinis incidentibus. In eo tamen scrupulus residere potuerit, quænam pars ex hoc intestinatorum sinu maxime proclivis sit ad semina tot malorum concipienda. Nos primum ex tenuibus intestinis duodenum nempe, hujus culpæ coarguimus, non ineptis argumentis persuasi, ingentium morborum causas, quas nemo sibi in hoc angulo finxerit, nedum quæsiverit ibi nidulari. Quæ materia, paucis adhuc dedu-

Eta fa-

Etā satis cum digna sit ampliore contemplatione, & non mediocrem promittat utilitatem, præſenti diſſertatione hanc explicandam nobis ſumpſimus, quantum per vires ingenii licet, eandem tradituri. Quem laborem ne ſine auſpiciis divinoque favore ſuſcipiamus, illum, qui res mortalium, qui eorundem vitam ac valetudinem potenti præſentique Numine moderatur, devotiſſime precamur, ut inveſtigantibus nobis vires clementiſſime largiatur.

§. 1.

Dilecturi itaque de duodeno, idque mille malorum ſedem adſerturi, neceſſarium omnino arbitramur, ut, priuſquam altius in ejus explicationem deſcendamus, paucis præmoneamus, in præſenti diſſertatione minime id nobis eſſe propoſitum, ut hujus ſententiæ autores nos profiteamur, quippe falſo nobis hanc gloriam vindicaturi. Debetur hæc potius immortalis memoriæ Medico Sylvio, qui ante aliquot luſtra totam medendi ſcientiam truncam ac debilem adhuc principio quippe firmo ſtabiliſque deſtitutam, in ampliorem decorem re-poſuit, & omnem fere curandi rationem hoc fundamento confirmavit. Is itaq; fuit, qui primus omnium hanc viam vidit, viſamque longius omnino perſecutus eſt, & triumviratu humorum, bile, pituita, ſuccoq; pancreatico corpus regi profeſſus, ex eorum temperie mixtioneq; & clementi efferveſcentia non digeſtionis modo, ſed ipſam quoque vitæ atque ſanitatis rationem deduxit. Sicut è contrario ex horum etiam intemperie, & nimia eorundem abundantia vel defectu omnes omnium morborum cauſas imo ſanandi rationem naſci contendebat. Quæ cum ipſe, latius uberiusque in ſua praxi perſecutus ſit,

fit, & speciatim l. praxeos p. 174. persequatur, supervacuum nobis videtur, prolixius eadem enumerare.

§. II.

Fuit itaque hæc Sylvii sententia, ut lucem adspexit, ingenti excepta adplausu, primum quod nihil obscurum, imaginariumque, nihil de veterum somniis retinebat, deinde quod ex ipsa rerum natura, velut ex fonte, deducta claro exploratoque insistebat fundamento. Eadem tamen, posteaquam altius examinari cœpit, quam prius consecuta erat laudem magna ex parte destituit, illius nævos, anatomia & physica denudantibus. Nempe enim minus latere poterat iis, qui hisce in studiis versati erant, impetu magis, quam diligenti ratione eo adactum fuisse Sylvium, ut *effervescentiam succorum* uti loquitur, in duodeno adfirmaret. Quam opinionem ut argumentis tueretur, bilem pure alcalinam omnino adferebat, quod quam falsum sit, vel ex eo liquet, quod adfuso etiam validissimo acido, quale est sp. vitrioli, illa non effervescat, in flavam potius ac mucilaginosam offam coalescens. Quod idem ex eo colligere licet, quod, ubi spiritum nitri, qui æque vehemens acidum est, adjeceris, idem talem coaguletur, & viridi adsumto colore, quam lenissime commoveatur. Neque minus errasse videtur, quod succum pancreaticum, ceu acidum adseveraverit, cum anatomicis constet experimentis, hunc, quodcunque etiam alcali adfundas, nullo modo cum eo effervescere, nedum cum bile conflictari. Imo exciso pancreate vitam spiritumque incolumem manere animantibus, CL. Brunnerus in de pancreate libello erudito demonstravit, quo unico experimento non mediocriter hæc Sylvii opinio adfligitur.

In eo vero magnum errorem admisit, quod ex hoc triumviratu vitæ sanitatisque rationem explicaverit, & ex eodem universam medicinam tam theoriam quam praxin quasi à capite arcesiverit. Neque enim potentem satis esse hanc sententiam, plura testantur, quæ cum ad explicationem rerum naturæ & ad ipsum remediorum usum pertineant, minus tamen ex hoc principio derivari possunt. Ut enim taceam de iis morbis, qui in certis ætates temperamenta familias & tempestates incidunt, satis superque constat, ex rabidi canis morfu, ex putrido miasmate pestis, dysenterix luis venereæ, imo ex, sola animi perturbatione gravia oriri mala, quæ sine prævia humorum corruptione ægotantem conficiunt. Porro experientia confirmatum est, ex sanguinis abundantia, ejusque extra vasa secesione, item ex viscerum vitio & ægotare plures & iisdem intercipi, cum manifesto argumento, graviter eum erraturum, qui in his morbis triumviratum culpæ accusaret. Quæ quidem omnia eo fine à nobis dicta sunt, ut adpareat, hanc Sylvii sententiam utilem alioquin, explicandæ toti medicinæ sufficere nunquam. Quanquam autem neque universalis sit, neque explicata satis, non contemnenda tamen observatio est, sed suam etiam utilitatem eamque amplam pollicetur, modo curam adhibeas, ne Sylvium secutus nimium ejus fines extendas. In quo uti ille Vir erravit, ita tamen illius sententia probatur, & ita nos idem tamen probamus, quod plurimi ex chronicis malis in duodeno existant, ibidemque generentur. Et hoc quidem est, quod in præsentī dissertatione meditamur, hanc Sylvii sententiam, quæ fere exolevit, revocaturi & saniore eam sensu explicaturi.

caturi. Natura nempe mortalium hoc quoque nomine prava & sinistra est, ut novas dictorum sententias quæ aliquid utilitatis habent minus recte intueantur, quippe primocum impetu ad eas ruentes, mox, ubi effectus non responderit, easdem destituentes. Adeo, uti in ceteris rebus mortalium, ita hic est arduum omnino, modum tenere. Quod idem fatum Sylvii sententia sustinuit, quæ ubi primum in lucem prodiit, avidissime excepta fuit, mox ubi non in omnibus respondit, (neque enim respondere poterat) eodem consensu destituta ac repudiata fuit, cum tamen revera, multum veritatis suo loco & pretio æstimandæ in medendi methodo hac in hypothesis occultetur. Nos itaque jam in eo occupati erimus, ut hypothesein à Sylvio primo propositam nostro vero tempore partim neglectam, partim suppressam vindicemus & quasi ex tenebris in lucem revoce-
mus.

§. IV

Est vero hæc nostra sententia firma ac stabilis primum tenuium intestinorum, quod duodeni nomine venit, ab usu & officio reliquorum intestinorum plane esse remotum atque distinctum, adeoque singularem considerationem mereri. Provida namq; natura non contenta ventriculum superiorem & majorem condidisse, ipsi adicit ventriculum minorem, & quemadmodum in primo & majori ingestorum magis rudis & simplex fit solutio, ita in secundo & minori fit magis intimior & chymus plus elaboratur, miscetur & adtenuatur. Sicuti vero hujus Intestini usus maximi est æstimandus, ita ex adverso si vitio laborat, si muneris sui obliviscitur, sedes ac diversorium & tomes fit multorum magnorumq; morborum. Ut verò

huius adfirmationis veritas magis constet clariorque ea fiat, placet jam ex ipsis anatomicis paulo subtilius & diligentius duodeni structuram ac fabricam & ex hac ipsum usum ejus æstimare.

V.

Nobis nempe, uti antea dictum, duodenum videtur parvus ac succenturiatus ventriculus, & magna digestionis alimentorum officina. Primum vero ventriculi requisitum est, ut gaudeat flexura sive curvatura & habeat fundum, in quo paulo diutius ingesta hæreant ac commorentur. In eo vero anatomici ferme omnes consentiunt, quod duodenum ab orificio ventriculi dextro incipiens insignem versus spinam repræsentet flexuram. *Riolanus in Enchirid. anatomic. Patholog.* duodenum ad spinam complicari dicit. Idem sentit *Blanckard. in Anatom. p. 410.* Duodenum, inquit, à pyloro versus spinam sub ventriculo excurrit, fere circa mesenterii centrum, deinde lumborum vertebri per ligamenta membranosa jungitur atque sic ulterius ob brevitatem nulla circumgyratione facta, circa renem sinistrum, ubi Jejunii anfractus inchoantur, terminum consequitur. Eodem modo *Hornius in Microcos.* Duodenum inquit à ventriculo incipit & facto deorsum parvo flexu recta fertur spinam versus, cujus vertebri lumbaribus transversim incumbit fere circa mesenterii centrum. Et *Munnyks Lib. de re anatomic. p. 36.* hæc habet: tenuium intestinorum primum à duodecim digitorum mensura duodenum veteribus dictum, à pyloro principium habet, factoque deorsum flexu recta fertur spinam versus, cujus vertebri lumbaribus transversim incumbit: ductum admittit biliarium, atque pancreaticum, habetque sibi annexam latiore pancreatis extremitatem. Ubi circum-

volvi-

volvitur, intestinum Jejunum appellatur. *Vesalius in Anatom. p. 379.* de duodeno hæc proposuit: Ex humiliori orificio ventriculi, quod è sua elatiori & dextro ipsius lateri proxima consistit sede, principium intestinorum exoritur, illive orificio, ubi id crassiori sua substantia introrsum protuberat, continuatur, ut simul atque è ventriculo pro-
dit in posteriora retortum sub fede ventriculi posteriore secundum dorsi dextrum latus recta deorsum proficiscatur, in nullos omnino anfractus revolutum. Errant itaque plures ex anatomicis, qui duodeni terminum ibi constituunt, ubi ductus biliarii, vel pancreatici in homine orificium in duodeno prostat. Rectius vero ibi finis est ponendus ubi flexura duodeni desinit & in anfractus incipit convolvi. Unde rectissime *Verheyen in Anatom. p. 41.* scribit: Duodenum ab orificio ventriculi dextro initium habens, versus spinam reflectitur, atque in latere sinistro, ubi anfractus incipiunt, terminatur. Et optime quoque *Hornius in Opuscul. Anatomicis*: Duodeni finis ubi sit non satis est determinatum apud Autores. Nam qui 12. digitorum longitudinem à qua nomen habet, in eo reperiri volunt, non ad insertionem pori biliarii, respicere debent, sed potius terminum ejus in sinistris quærere, ubi jam in gyros volvi incipit intestinum. Et *Higmoreus in Anatom. p. 27.* finem quoque duodeni statuit, ubi hoc in gyros incipit convolvi.

§. VI.

Alterum requisitum ventriculi est, ut ejus cavitas sit ampla & capax, jam vero utut capacitas duodeni longe minor sit ea, quæ in ventriculo deprehenditur; nihilominus multum reliqua intestina amplitudine superat. Unde *Vesal. in Anatom. p. 379.* verissime scribit: Duodeni pars

sub ventriculi fundo, ad dorsum proxime adligata, inter dissecandum capacior, ampliorq; reliqui Intestini ductu occurrit. Veslingius quoque laxitate & amplitudine insigni præditum asserit. Quod etiam *Diemerbroeck* adfirmat *p. 153.* dum ait: Quotidiana anatomica observatio ostendit, hoc instinum non nunquam laxitate & amplitudine insigni præditum reperiri. Vehementer itaque errant illi Anatomici, ex quorum censu est *Bartholin.* *Bauhin.* & *Blancardus* qui existimant, duodenum reliquis tenuibus crassius quidem esse, sed angustius. Deinceps quod duodenum gaudeat munere ventriculi vel ex eo innotescit, quod ejus textura, præsertim interna eadem sit cum ventriculo. Habet hic tunicam glandulosam ac villosam, ex qua continuo sudat atque distillat succus solvens fermentescibilis. Eadem tunica visitur vel potius continuatur in duodeno. Hæc non separat liquidum ex intestinis, nam nullæ sunt viæ vel ductus patentes, sed potius secernit succum à sanguine similis indolis cum menstruo sic dicto ventriculi. Illud vero maxime memorabile, quod duodenum, præter tunicam glandulosam crustaceam, innumeris parvis glandulis instructum sit, quæ separata tunica villosa in nervea positæ sunt, & visui occurrunt. De hisce *Wepferus in Histor. cicut. aquatic. p. 190.* ita scribit: In duodeno plurimas insignes glandulas ultra palmi latitudinem à pyloro divisim sparsas inveni, quæ detracta tunica fibrosa quasi conglomeratæ apparent, dimidiati seminis cannabini magnitudine, quæ aqua maceratæ mucum stillabant copiose etiam octavo adhuc post mortem die. Harum glandularum inventor celebratur Clarissimus *Brunnerus. vid. Misc. Natur. Curios. Dec. II. ann. 5. p. 464.* Glandularum harum officium sine dubio non aliud est quam ut lympham

men-

menstrualem fecernant atque infundant in cavum duodeni. Ulterius ventriculi requisitum præcipuum ac palinarium est, intimam dissolutionem ingestis præstare eorumque nexum ac mixtionem solvere, & hæc solutio maxime viget in hujus fundo ubi diutius hæerere solent contenta. Gaudet eo quoque privilegio & prærogativa imo majori noster ventriculus præ superiori. Nam hic accipit tantum fermentalem succum ex tunica glandulosa ac villosa, ille vero præter hanc tunicam & glandulas speciales, obtinuit peculiare quosdam insignes ductus, qui largo flumine infundunt fluida solventia magnæ activitatis. Influit nempe succus biliosus parciore quidem quantitate ex cystide, majori vero ex hepate & ejus ductibus biliariis, manifesto indicio, quod tanti succi copia præstare debeat usum egregium. Simili ratione ex magnitudinis eximiæ pancreatica glandula emergens ductus, lymphæ solventis fermentescibilis ingentem quantitatem advehit: quod etiam de magno & singulari ejus usu testimonium esse potest. Perquam vero dignum notatu est, quod hi duo ductus in homine ambo concurrant & horum orificia in papillam desinant, quæ directo fundo flexuræ duodeni superposita, quod Dn. Præses sæpius & nuper in anatomia annotavit, ut ex superiori loco sic guttatim in substratam chyli massam descendentes, mirabilis virtutis menstruum illud microcosmicum universale, vere balsamicum constituent, quod ex bile, quæ fluidum alcalino sulphureum est, ac succo pancreatico tenuissimæ ac spirituosæ indolis compositum est.

§. VII.

In ventriculo tantum fieri solet ingestorum dissolutio, nulla vero separatio vel secessio fluidi ad sanguinem unde

Unde omnium consensu ventriculus lacteis vasis est destitutus. Simili modo in duodeno nullæ viæ vel venæ lacteæ observantur, nihil itaque separatur, quod fit in aliis Intestinis, præsertim in Jejuno, & eum quoque in finem mesenterium non pertingit ad duodenum, cui alias cetera tenuia adhærent, & quod fulcrum non modo solet esse vasorum lacteorum sed & liberiores transitum ipsis præbet, potius duodeni interstitium occupat inferior & eminentior pars pancreatis cum mesenterii centro, quod vertebris firmiter alligatum. Centrum vero mesenterii dicitur, ubi ex aortæ trunco arteria in mesenterium fertur, ubi etiam plexus insignis nervosus ex spinali medulla prolabitur ad mesenterium ac intestina, nec non ex trunco venæ Portæ ramus dexter abscedit ad mesenterium.

§. VIII.

Hæc omnia adducta clarissime evincunt, jure meritoque duodenum quod dicitur, in classem magis eorum quæ ventriculi nomine gaudent referendum esse, quam in numerum intestinorum, quæ magis vacant secretioni quam digestioni. Et certe non leve occurrit dubium, an non in duodeno ceu ventriculo succenturiato plus vigeat digestionis negotium quam in ipso primario, ubi cruda modo & rudis saltim solutio videtur peragi, in nostro vero fit magis intimior, ciborum massa hic magis elaboratur, rectificatur, major partium attenuatio, major spirituscentia locum invenit. In ventriculo succus tantum lymphaticus cum reliquiis ciborum acidulis præsens est, in nostro vero præter hunc succum affluit adhuc alius penetrantis & activæ naturæ, qui longè excellentius tenax viscidum pingue quod est in ciborum massa,

fa, diducit dissolvit, & se intime cum ingestis miscet, quod vel ex solo flavo excrementorum colore abunde apparet. Hoc vero consideratione maxime dignum est, nullum dari ex animantibus, quod destitutum sit hac Intestini flexura, sive quod non gaudeat parvo illo & succenturiato ventriculo. Nullum quoque datur animal, ubi non succus biliosus in vasto hepatis viscere genitus, in magna copia affundatur duodeno, perspicuo argumento, naturam prudentissimam maxime omnium occupatam esse, ut hanc essentialem corporis partem & ad vitam ac sanitatem tuendam summe necessariam recte construeret ac efformaret. Unde facillimum est judicare, quantus usus sit hujus prænobilis partis, quantumq; eadem ad universam corporis oeconomiam tuendam conferat. Et quemadmodum usus amplissimus & longe maximus est illius; ita etiam si vitium si defectus in illud incidit, si intemperie menstrualis succi laborant, si debito tonus hujus eximiae partis laesus vel destructus fuerit, magna turbatio in universa corporis oeconomia & ingens malorum proventus exurgit. Præsentis igitur instituti maxime omnium erit, inquirere, quomodo in hoc intestino ceu parvo ventriculo plurimae causae morbificae si præternaturam est adfectum, elaborentur & progenerentur. Et in eo laudandi quoque mihi *Helmontius* & *Sylvius* videntur, qui urgent maxime in scriptis suis, scaturiginem plurimorum morborum ibi ponendam ac quærendam esse.

§. IX.

Diximus in superioribus, omne principium morborum materiale, quod causae morbificae nomine venit, non in humoribus, qui jugi intra vasa feruntur circulo, locandum esse, utpote humores nunquam nocent debito

C

motu

motu provoluti. Nam non modo à corruptione alieni manent hac ratione, sed & nullam partem laceßere vel lædere ſufficienter poſſunt. Quapropter ut humor à naturali ſua indole deficiat, ut alienus fiat & corrumpatur, ut denique corporis partem lædat atque offendaſſet, opus eſt quiete, opus eſt ſtaſi ac ſtagnatione. Jam vero nulla pars in univerſo corpore nobis videtur aptior ad ſtagnationem, ad corruptionem fovendam, atque conſequenter ad generationem cauſarum morbificarum, quam ea pars, quæ flexuram habet, quæ ventris nomine venit, in qua propter flexuram diu hæſere ac ſubſiſtere poſſunt humores, in quam clañem jam præter ventriculum etiam referendum eſt duodenum. Solent enim humores maxime corrumpi & à natura blanda ac amica in inimicam nocentemq; primo ſola ſtagnatione, deinde aliarum heterogenearum rerum mixtione degenerare.

§. X.

Mora indolem alienam & virulentam naturam induunt humores, ita etiam bilis, ſi quietem ipſi conceſſerit, maxime efferatur. Inde jam olim atro carbone notata fuit ab *Hippocrat. de Natur. human. p. 282.* qui ita ſentit: Viridis bilis juxta hepar manens ubi ſuperebul- lit, humani corporis corruptio eſt ac noxiuſ atque inutilis corporis humani inquilinuſ. Non aliud hoc loco intelligitur, quam quod bilis ex ſtagnatione in duodeno & ductibus biliariis corrupta corpori noſtro ſit nocentiſſima. Similis locus hac de re extat *Lib. de Medic. veter. p. 34.* qui hic eſt: cum amaritudo quadam diſfuſa fuerit, quam bilem flavam adpellare ſolemuſ, quales ſtatim anxietates & æſtuſ & impotentia occupant; verum ubi liberati fuerimuſ ab illa & repurgati, aut ſponte, aut per medicamentum, ſi modo tempeſtively quid ipſorum fiat,

mani-

manifesto & à doloribus, & à calore liberamur. Quando autem tempore eodem elevata fuerit, & cruda est mē-
raca ac intemperata, nulla arte neque dolores neque fe-
bres sedaveris. Et quos quidem acuta acrisque ac æ-
ruginosa bilis affligit, eos mox rabies & morsus viscerum
ac pectoris corripit desperatio? Non sedantur autem
hæc, priusquam eadem expurgetur & prosteratur, & a-
liis permisceatur. Qui elegantissimus locus abunde de-
clarat, quam graves affectus corruptam bilem soleant
consequi.

§. XI.

Primum vero sermonem facere placet de bilis præ-
ternaturalem stagnatione, ad quam non modo bilis fe-
gnities, & defectus partium salino-sulphurearum in illa,
sed & tonus & motus peristalticus hujus Intestini labe-
factatus plurimum contribuit. Deficiente enim hoc
motu peristaltico bilis quæ continuo affluit ingenti in-
copia ad cumulata & congesta in hac parte, mirifice
intestinum distendit, quâ de re notari meretur locus
ex *Diemerbroeck* p. 53. in *Anatom.*: Quotidianæ inquit
anatomicæ sectiones docent, hoc intestinum non
nunquam amplitudine insigni præditum reperiri, at-
que tunc majori à succis fermentaceis acrioribus vitiosis
in illum delabentibus, hincque validis inductis fermenta-
ceis effervescentiis à quibus non solum ipsum val-
de distenditur; verum etiam molesti rugitus, magni do-
lores, lancinationes, summæque anxietates in viventibus
oriuntur. Ita *Miscell. Natur. Curios. Dec. II. ann. 2.*
p. 86. observant, in cachectico vesicam biliariam
hepatis annexam, bile plane vacuum; intestinum vero
duodenum, humore bilioso repletum adeoque dilatatum fu-

isse, ut quasi bursam referret, qua humoris libra ad minimum contineri potuisset, cum enim sectione præpropere aperiretur, plus quam dimidium humoris crassioris è flavo nigricantis effusum, & nihilominus in ipso superfuisse 12. amplius cochlearia. Sæpissime accidit, bilem in duodeno plus justo accumulari & ipsa stagnatione & distensione multa pathemata excitare, videlicet dum intestinum vehementer distenditur, non modo tunicæ, quæ exquisito sensu pollent, affliguntur, sed & rami plexus mesenterici tenduntur, nec non vasis sanguineis compressis congestio sanguinis fit circa truncum venæ portæ & initium arteriæ meseraicæ: sequitur hinc fixus in lumborum prima vertebra dolor, præcordiorum anxietas, appetitus dejectio, somni & virium defectus, alviq; adstrictio. Observavimus sæpius, ejusmodi pathemata in corporibus imbecillioribus, in feminis, quibus menses defecerant, in hypochondriacis, in intermittentibus præpostere suppressis, in diætæ aberratione, præsertim post iracundiam. Tali in casu parum efficiunt stomachica, carminativa, absorbentia, laxantia, multo minus anodyna, quæ potius noxiosissima observantur: sed optimo consilio, emetico cum cautelis administrato oportet primam regionem succis biliosis stagnantibus deplere. Dum hæc scribimus, occurrit nobis casus Viri in hac civitate honestissimi, qui paulo imbecillioris naturæ, per vitam sedentariam & continuos labores, quos ratione officii laudatissime administrat, ingentem humorum impurorum copiam circa primas vias colligere solet. Is si ventriculus plus justo alimentis difficilioris solutionis aggravatur, premitur anxietatibus, circa præcordia angustiiis, phlogosi, dolore circa scrobiculum cordis & circa latus dextrum

dextrum, cibos porro respuit, corpus lassatur, somnus parvus, & flavo fœdoque colore tingitur cutis: hæc symptomata sæpius recurrunt. Rhabarbarina cum abstersivis salibus & aperientibus mixta, non inutilem locarunt operam, sed paulo tardius curam confecerunt, quæ plerumq; ad tres septimanas extendebatur. Expositis his ante paucos dies *Dn. Præsidi* a Nobilissimo ægroto ipsum fallere non poterant, quin re probe pensitata atq; examinata judicaret, stagnationem bilioforum humorum in duodeno, maxime in causa ac culpa esse. Unde lenissimum emeticum ad saburram horum humorum expediendam porrigebat. Æger qui præcedente nocte integra vehementissimis cruciabatur symptomatibus sine omni somno, altero mane sumit emeticum ex gr. j. tartari emetic. soluti in aqua menthæ: mox quatuor vomitibus mensura imo ultra bilis crassæ, obscuro-flavæ viscidæ in vas stanneum rejicitur, quos vomitus subsequantur quatuor alvi dejectiones. Hac peracta operatione simul & semel cessant symptomata, appetitus cum somno redit, anxietates omnes remittunt, & cum morbo redit in gratiam. Quæ unica morbi historia nos edocet, quam insigni efficacia sit emeticum, si mali causa delitescit in primis viis.

§. XII,

Deinceps bilis in duodeno stagnatio alvi excitat tarditatem; meretur enim notari, quod, si motus peristaltici defectio sit in primo intestino, reliqua etiam una patiantur, ut tardior fiat contentorum progressio. Accedit quod bilis ceu stimulus intestinorum retenta, difficiliorem contentorum progressum per intestinorum anfractus efficiat. Confirmat hoc ipsum inter alia observatio

quæ extat in *Miscell. N. Cur. loco citato.* Præterea in duodeno subsistens bilis cum liquore pancreatico atque ingestorum mucosus flatus excitat, qui lumborum dolores atque anxietates movent, & nephriticam colicam imitantur. Elegans hanc in rem est *Observatio 57. Pechlini* qui inquit: Obliquus assurgens tenuium illa pars lienem versus acutiusque inde reflexa vel situs ingenio efficit, ut diutius ibi hæreat, quicquid justo viscosius allabatur, sive pituita sit, seu lymphæ pancreatica sive bilis seu denique flatus. Periclitatur autem quam maxime hic locus in foeminis, ut quæ asotica horreorumque fructuum ingluvie cruditatibus fermentationibusque flatulentis copiosam ministrat materiam, in illa imprimis corporum per balneationes, imò & ferreos thoraces stricturna. Equidem cum succi importunius effervescentes spatium requirant solito majus, in quo libere se expandere possunt, accidit, ut compresso illo hypochondriorum angulo, quem dilatari oportebat, & succi & flatus ibi hæreant & fixa sede novis corruptelis & fermentationibus viam aperiant. Eodem modo distensio duodeni à flatibus producere solet fixum dolorem chronicum in lumbis, id quod suo tempore jam notavit Sylvius; qui dolorem, lumbos quasi perterebrantem, in eo loco fieri existimat ubi confluxus bilis & succi pancreatici existit. Notum est febrilium insultuum initia plerumque fieri cum dolore fixo lumborum, eo in loco ubi centrum mesenterii vertebris alligatum est, cui validis & firmis membranis cohæret quoque duodenum, unde non mirum, violenta expansione harum membranarum, exquisitissimi sensus expansione facta, vicinos nervorum plexus ad spasmos sollicitari. Porro stagnant tam solida quam liquida in ventriculo

culo & duodeno, si spasmodice hoc intestinum constringitur, quo fit, ut omnis transitus ad reliqua intestina præcludatur. Experientia quotidiana constat, alimenta tam solida quam liquida ante triduum assumpta magna in quantitate ejici, imo ebrios sæpius post duodecim horas miram liquidi assumpti quantitatem reddere: qua de re eximium locum habet *Helmontius Lib. de febr. cap. X.* Si pylorus inquit nimia errat strictura, potus ibidem nonnunquam toto triduo perseverat, atque tandem plus unico vomitu rejicitur, quam per biduum sit assumptum. Hæ spasmodicæ constrictiones efficiunt, ut non modo humores corrupti sed & flatus subsistant in hypochondriacis & hysteri-
cis, in febrilibus insultibus unde anxietates inquietudines, oppresiones spiritus, dolores circa scrobiculum cordis, circa lumbos, nausea vomitusque exoriantur. Hæc strictura duodeni efficit sæpissime icterum, dum nempe crispatura & fortiori contractione tunicarum duodeni ductus cholodochus qui itinere obliquo ferme digiti minoris longitudine transit, coarctatur vel comprimitur, ut sic minus descendere bilis ad duodenum possit, unde restagnans bilis tam in ductibus biliaris, quam in cystide, non modo dolores & spasmos efficit, sed & per vasa lymphatica in sanguinem rediens foedum illum flavumq; colorem externo corporis cortici adspargiat.

§. XIII.

Sunt plures alii affectus, qui ex intemperie & corruptela bilis & succorum confluentium in duodeno præparantur; uti sunt febres præsertim intermittentes omnes, in primis tertianæ continuæ, lentæ, ardentes, cholericæ, variolæ, morbilli, diarrhoeæ, dysentericæ, cardialgiæ, tussis graviores chronicæ, arthritides, dolo-
res

res vagi & hujus generis plura. Corrumpuntur vero humores in hoc loco non tantum stagnatione sed & commixtione, cum aliis succis excrementitiis impuris, qui redundant ad bilem & succos ibi hærentes vel ex ventriculo, vel ex universa sanguinis massa. Ex ventriculo sæpe acidi, pontici, corrosivi ex alimentis ejus naturæ vel ex diuturna mora ibi geniti humores ad duodenum transeunt, cum bile miscentur & ibi moram trahentes biliosum balsamicum humorem mirum in modum dejiciunt atque deturpant. Bilis vero admixtione ejusmodi acidi non tantum coagulatur, & corrosiva evadit, sed colore, etiam suo mutato, æriginosum ac viridem habitum induit. Talis in duodeno existens rosione & vellicatione in vicinis partibus, tam ventriculo quam intestinis sensibilibus graves dolores, tormina, spasmodicas crispaturas in infantibus facillime convulsiones & epilepsiam suscitant. Malum itaque signum est, si in hisce excrementa descendunt viridi colore tincta, quæ sæpius tam corrosiva sunt, ut lintheamina inde exesa atterantur. Ab eadem bile æruginosa stagnante tusses stomachales chronicæ & ferinæ, non modo in infantibus sed etiam adultioribus oriuntur. Eademque sæpe intermittentibus & hypochondriacæ affectioni se associant, quo calu omnia dulcia, pectoralia plus damni quam emolumenti afferunt. Solet talis tussis certas periodos servare tam de die quam de nocte subinde recurrens. Infringitur enim quodammodo acidum corrosivum, alimentorum succo adfluente, quo minus graviter vellicare subjectas partes possit. At ubi hic succus recedit, in reliqua membra diductus, relinquitur corrosivum, quod priore impetu resumpto terrimas membranas duodeni flatibus distent corripit in con-

consensum trahentes diaphragma plexus mesentericos stomachales, pneumonicos & sic violenta fit tussis, quandoque cum vomitu & suffocationis metu, propter sequestrationem & affluxum feri viscerum in bronchia pulmonum. Tales ferinas tusses curavit Dn. Præf. brevi tempore felicissime solo pulvere ex lap. cancor. composito, adjecto oleo anisi, pro dosi drachmam unam binis de die vicibus offerendo. Infantibus hoc afflictis malo leniora emetica it. infusa rhabarbarina cum manna colluviem istam viscido-biliosam detrahendo insignes ferunt supplicias.

§. XIV.

Talis caustica bilis in flatus resoluta sæpe in remotis partibus atrocissima producit symptomata. Notabilis est *Observatio River. Cent. 2. obs. 8.* Dolor acerbis singulis noctibus affligebat post primum somnum, incipiebat in latere sinistro, & ad anteriorem partem thoracis & posteriorem ad latus sinistrum & scapulas extendebantur, tanta vehementia, ut subito excitatus in nulla decubitus forma consistere posset. Perseverabant isti dolores usque ad matutinum tempus & tunc temporis quiescebant, tota die non amplius apparentes. Optime judicat Riverius, causam esse flatus, qui ex illuvie pravorum crudorumque humorum in primis viis ob pravam victus rationem congestorum à calore intensiori facto in somno oriuntur. Sæpius notavimus in plethoricis & qui avidius comedunt, quod certis horis in somno post factam digestionem expergiscantur, magna cum anxietate angustia circa præcordia & quasi metu suffocationis, quibus V. S., emetica & abstinencia à cœna præsentissimam opem attulerunt. Quandoque etiam effectus pravorum istorum succorum

in duodeno primisque intestinis stagnantium usque ad caput se exerunt, cephalalgias, vertiginem, torporem omnium sensuum imò apoplecticos insultus ibi machinantes. Vomitus bilis, quæ instar aquæ fortis ebulliebat fuisse causam hemicraniæ *Borell. Cent. 2. obs. 1.* testatur. Laborabat, quidam tertiana & gravi capitis dolore pungente ac lancinante, dimidiam capitis partem occupante, vomitorio sumto ejecit libram unam bilis porraceæ & rursus pari quantitate, sequenti accessione redita ut omni capitis dolore liberatus fuit *vid. River. Cent. 1. obs. 27.* Nuper generosus Vir hic locorum post sanguinis detractionem liberalius per aliquot dies vino semet invitare cœpit, adsumtis etiam subinde ostreis aliisque, quæ difficilius concoquuntur. Inde languere primum cœpit, mox paulatim senescente adpetitu, ipse super mensam, cui conviva adhibitus fuerat, subito summo præcordiorum æstu corripitur. Sequitur vehemens frigus torporque & animi defectio, omnibus insuper sensibus velut extinctis. Injecto clystere alvus sexies dejicitur, & inde parum adlevatus, post paucos dies lectum reliquit, mox eodem adfectu quamvis mitiore in convivio oppressus, & ciborum fastidio & virium languore eidem adhuc adhærentibus. Tandem deprehensa mali causa, emeticum lene offert Dn. Præses, quod ubi adsumpsit, ingentem viscidæ materiæ viridisque bilis per superiora & inferiora rejecit, inde exhausto mali fonte præsentis periculo exemptus cum gaudio in hæc verba erumpebat: *Es ist als wenn ich neu geboren wäre.* Neque dubium est, quin omnia hæc symptomata à bile porracea ventriculi orificia irritante, orta fuerint.

§. XV.

Vertigo quoque, æque molesta passio in hoc duodeno domicilium sedemque sibi constituit. Et inde est, quod jejuno ventriculo cum nausea orisque amaritie hic adfectus corripiat, sicuti idem contra adsumtis cibis, mitigatur. Ex vitio etiam stomachi epilepsiam adnotavit Galenus, non sine conjectura, bilis in duodeno nostro velut in cubili delitescens. Memorabilis quoque morbus est, quem ex eadem causa profectum Dn. Præses nobis communicavit. Annus nempe fere est, ex quo Comes quidam ex Saxonia, turbato verum statu perterritus, huc concesserat. Is in consilium rogans Dn. Præsidentem conqueri cæpit de adfectu gravissimo, quo per annum fere laboraverat. Ipse alioquin plethorico-cachymicus erat, quem habitum ex diuturno mœrore victus vitio vitæque sedentaria sibi contraxerat. Itaque hic singulis fere noctibus circa horam tertiam & quartam acerbissimis doloribus excruciabatur, qui circa umbilicum primum emicabant, mox hanc regionem emensi ad dorsum, novissime ad ipsa præcordia inclinabantur, ita constricto ægro, ut jamjam strangulandus extrema meditaretur. Accedebat summa anxietas, sensuum torpor, sæpe etiam epilepticæ contractiones, & hæc symptomata, ubi alvus adstrictior erat, omnia intendebantur. Clysteribus carminativis & clementer laxantibus imo emetico subventum ægro fuit, quæ remedia mirifice levarunt illum, quamvis ipsum malum, quod nimis altis radicibus infederat, non expugnare potuerint.

§. XVI.

Apoplexiam porro sæpe in ventriculo & duodeno generari, præter frequentes observationes Helmontius

testatur, solerter hanc illius mali latebram subodoratus. Aperte enim scribit in libro, in quo morborum sedem in anima sensitiva ponit, recentem apoplexiam sæpius vomitu rebusque aromaticis se curasse. Quod identidem confirmat *Cl. Wedelius in pathologia dogmatica*, p. 135. clarissime testatus, tegularium Jenensem, qui in apoplexiam inciderat, adhibito remedio plenissime fuisse restitutum. Nempe crebra experientia loquitur, quod, qui sanguinis alioquin abundantia laborant, circa æquinoctia tempore plenilunii & hyemali, ex iracundia vel intemperantia, apoplectico insultu opprimantur, adfectum sæpe præcurrente vomitu, sæpe eundem concomitare, qui tamen tetro atroque colore tinctus adparet.

§. XVII.

Ex hac colluvie humorum, qui in ventriculo ac duodeno accumulati sedent, alia quoque atque etiam graviora mala descendunt. Inter quæ primo loco ponimus lentas febres, quæ ex intermittentibus, sæpe etiam ex acutis generantur. Nempe ubi illæ, nimis festinanter, nec expurgatis ante primis viis, adstringentibus, ex quorum censu china china est, sistuntur, tunc colluvies foetida intra ventriculum detenta facile gravioribus malis præbet occasionem. Quod identidem accidere potest, si post acutum atque diuturnum morbum avidius cibi adsumuntur, quibus digerendis cum ventriculus minus sufficiat morbi vehementia debilitatus, non potest aliter fieri, quam ut materia novo morbo præparetur. Ex horum numero, uti diximus sunt febres lentæ, quæ hisce signis adpropinquant. Vexat corpus calor lentus cum pulsu celeri & frequenti adest lassitudo languorque virium sudor nocturnus, & corporis macies. Ubi igitur o-
rigi-

riginem hujus mali recte cognovimus, facile videmus, minus convenire in hoc adfectu refrigerantia, quæ adeo non juvant, ut potius perniciem ægrotis adferant. Tendenda potius cura est salibus absterfivis & lenioribus emeticis, laxantibus & amaris medicamentis, quæ in hoc malo unicum præsidium ægrotis pollicentur.

§. XII.

Haftenus quidem dictum à nobis, quomodo bilis per stagnationem admixtoque eidem acido vitiata graves multosque morbos excitare possit, jam institutiratione adacti de eo solliciti erimus, ut quæramus, quomodo naturalis ejus constitutio ac crasis ab aliis admixtis partibus retexi ac corrumpi possit. Itaque omnino recte statuimus, maxime id fieri à suppressione aliarum excretionum & præsertim transpirationis. Jam primum satis constat, quam salutaris quam necessaria vitæ sanitatique sit hæc per cutem evacuatio, quippe quæ universi corporis ac sanguinis emunctorium recte adpellatur. Per hujus nempe poros omnia expirant, omnia exhalant, quæ superflua & inimica naturæ à vitali sanguinis circulo velut purgamenta rejiciuntur. In hoc censu est principium salino sulphureum, subtile aëreo aqueum, quod ubi intra corpus retinetur, fontem nostræ vitæ sanguinem nempe facile inficit, corrumpitq;. Inde est, quod hac expiratione interclusa, plures gravissimique morbi prodeant, maxime omnium febres cujuscunq; generis & quæ cum exanthematibus criticis conjunctæ sunt.

§. XIX.

Rationem vero hujus rei ut reddamus in genere, adnotandum est, ab inhibitis excretionibus humores corporis nostri maxime lædi, idque inprimis accidere ab in-

tercepta transpiratione. Ubi enim acerrimæ sordes exitum non inveniunt, occlusis poris, in corpus inclinatae ad lympham atque bilem redeunt, quæ inde alienam, plane naturam sortitur. Atque hæc corrupta hoc modo ubi in intestina delabitur, ibique non mature eliminatur sed subsistit & stagnat, ipsa mora deterior adhuc reddita, immutata magis Shesi illius, seminarium existit morborum præsertim febrium. Unde non sine ratione iudicamus, in duodeno periodicorum morborum maxime febrium semina delitescere, hac in re merito *Clarissimo Medicorum pari Sylvio Helmontioque* accedentes. Quorum ille passim in scriptis suis hoc argumentum tractat, duodenum ceu sedem multis morbis adsignans, hic autem *l. de febb. cap. 17.* diserte hæc ipso veritatis stylo consignavit. *Febris inquit* habet virus, quod circa pylorum & paulo infra hunc hospitatur. *Et cap. X. n. 3.* hæc scribit: Nidus febrium est in primis officinis, extenditur scilicet à pyloro ad duodenum. Consentit huic sententiæ magnus Galliae Medicus Fernelius, qui *lib. 6. c. 7.* nidum intermittentium circa stomachum, duodenum & pancreas adserit. Harum igitur febrium sedes recte in duodeno constituitur, siquidem ex corrupta lymphæ & bile velut in officina hic adornantur. Præcedit plerumque transpiratio suppressa, plethora, robur ventriculi ac intestinorum ex in temperantia debilitatum, quibus rebus corruptio hæc maxime adjuvatur. Si enim transpiratio non respondet, bilis sordibus commixta vitium capit, eademque si tonus ventriculi segnescit, intra intestina detinetur, deficiente natura ad excernendam eam. At ubi subsistit & corrumpitur, non in hac solum regione tyrannidem exercet, sed ad sanguinem delata novam malorum scenam

scenam expandit, membranaceas nerveasque corporis partes variis spasmis doloribusque adfligendo.

§. XX.

Diximus supra, intermittentium præsertim tertianæ sedem in ventriculo & duodeno esse, id quod & ipsa symptomata confirmant, quæ hos adfectus eosque incipientes comitantur. Principio enim harum passionum flatus duritiesque abdominis, dolor dorsi fixus nausea præcordiorum anxietas & inquietudo exercent. Mox remittente se frigore, accedit vomitus, color faciei flavescit, corpus calore exæstuat, siti nullo liquore restinguenda ora exuruntur, urina fertur flammea & quod à purgantibus per alvum dejicitur flavissimum colorem repræsentat. Junguntur sæpius biliosi vomitus, interdum etiam viscidi & ab adsumta china chinæ, præsertim in iis corporibus, in quibus duodenum bilis abundantia turgescit, alvus sæpissime biliosa descendit. Cujus rei hæc omnino ratio est, quod hoc remedio tonus intestinorum lauescens alioqui restitutus motum identidem peristalticum augeat sordes, quo pollet robore expellentem. Nonnunquam icterus se adsociat, bile ad sanguinem, à quo salutari modo antea rejecta fuit, redeunte. Magna hæc omnino symptomata intermittentibus, majora utique tamen eadem sunt in tertianis continuis, & gravius utroque malo in ardentibus, quas causonas Græci vocat, intenduntur. In causa enim bilis acerrimæ copia infesto stimulo membra exagitans, & inde est, quod omnia, quæ bilis acrimoniam eluunt, quæ ejus stimulos obtundunt, quæ primarum viarum sordes abstergunt, hisce morbis unico præsidio adjumentoque sint. Ejusmodi sunt leniora emetica, nitrosa salina & absorbentia quæ in ejusmodi mor

di morborum cura merito suo celebrantur.

§. XXI.

Et hæc quidem remedia in omni ejusmodi passione avide amplectenda sunt, minus tamen sufficiunt, si pertinacius intermittentes insistant exemplo quartanæ. Hic enim pertinacia mali remediis non cedens altius radices jam egisse & in ipsis visceribus resedisse adfectum indicat, siquidem manifestum inde est, hepar pancreas & lienem obstructione laborantes, succum tam biliosum quam pancreaticum continuo rivulo intestina subeuntem, corrumpere, fomitem mali inde subministrantem. Itaque ubi ejusmodi casus incidit, non satis est, dictis remediis ægrotantem tractare, sed validiora adhibere oportet, quem in censum referenda aperientia fortiora, salia, & quæ ex rhabarbaro ex marte mercurioque dulci constant medicamenta. Neque tamen removenda interim sunt emetica, quæ sæpius etiam in ipsa viscera penetrant, sordes in iisdem detentas expellendo. Laudem proinde invenit pulvis Riverii felicissimi Practici, qui cum & per alvum & vomitum vim suam exerat, hisce morbis egregie opitatur, quippe hoc vel centies quartanam sustulisse passim in observationibus suis, quas ideo legendas commendamus, attestatur. Eandem curam desiderant febres intermittentes, quæ circa tertium subinde diem exasperantur, quippe & hæc idemtidem ex bile acri corruptaque nascuntur. *Thonnero lib. 1. obs. 1. p. 10. id ipsum comprobante.*

§. XXII.

Contemplati igitur febrium naturam ac ingenium, ad eos morbos accedimus, qui per exanthemata sese manifestant. Placet vero primam nominare purpuram, morbi genus, quod aliis regionibus parum notum, longe late.

lateque in hisce terris dominatur. Idque aliis maxime morbis jungitur, iisque jam fere inclinatis, non aliam ob causam, quam quod exiccatis per febrilem fervorem intestinis, alvo idemtidem exarescente, materia corrupta biliosa in primis viis minus corrigatur, quæ tandem magis corrupta nec per medicamenta rejecta cum sanguine miscetur, & hocce malum molitur. Eamque, quam proposuimus, causam vel illud etiam confirmat, quod purpura sæpe accidere soleat, si diutius alvus adstricta fuerit, neque clysteribus neq; mollioribus laxantibus exsoluta: Eadem infantes sæpe invadit cum vomitu diarrhoea febris tussi & dentitione difficili. Adest præter hæc mala immodica sitis, præcordiorumque anxietas & vigiliæ. Nascitur etiam hoc malum ubi V. S. cui alioquin advevit aliquis, per tempus fuit intermissum, & finitur maxime purgatione, ideoque sedulo in hoc adfectu providendum, ut alvus semper respondeat. Sunt, qui hoc malo correpti largum de nocte sudorem fundant, sunt, qui matutino tempore id patiantur, dantur etiam, qui singulis annis chronica purpura laborant, cum non obscuro indicio vitii in hepate & bile desidentis. Juvat itaque in ejusmodi casu, per vomitoria & laxantia clementiora, inire curationem, quippe quæ medicamenta optimam locant operam, siquidem & hoc malum à bile acri stagnante sæpe proficiscitur. Simili modo perpetuos sudores cum pruritu curatos fuisse, solertissimus Vir P. Borelius cent. 2. obs. 36. adnotat, adhibito nempe vomitorio & abstinentia à vino.

§. XXIII.

Ipsa porro arthritis & podagra in hoc chronico-
rum morborum stabulo desidere videntur. Adoritur,

E

nempe

nempe hic adfectus hypochondriacos & debilioris naturæ homines, qui velut hereditate quadam laxam mollemque membranarum texturam acceperunt. Hi itaque maxime proclives ad hoc malum sunt, præsertim verno & autumnali tempore, quia hisce tempestatibus, propter aëris inæqualitatem varietatemque transpiratio maxime læditur salibus inde tartareis, quibus ejusmodi corpora scatent, legnitus per urinam procedentibus. Unde hæc, exitu ipsis intercluso, ad humorem biliosum & salivalem pancreaticum confluunt, primam regionem variis malis divexando. Talia sunt flatus, præcordiorum dolor alvi segnities, dolor circa lumbos oberrans, febrili motu simul concomitante. Quod vero in primis viis causa mali lateat, vel ex inde adparet, quod leniore sæpe emetico sub adventum mali dato, adfectus si non supprimatur certe mirifice adlevetur. Eleganter hanc in rem diligentissimus Hippocratis Commentator *Martianus*: In arthriticis, inquit, doloribus ob acorem in ventriculo peccantem à doloribus correptos memini, qui ab iisdem liberati vel levati fuerunt, ubi acida evomuisse. Quod idem talem comprobatur Sylvius, aperte scribens, hanc curam per vomitionem utilissimam arthritidi, multisque eandem à se confirmatam experimentis. Imo eadem ratione non, paroxysmum tantum imminuentem sublatum, sed & novi impetus semina extincta fuisse, idem eodem loco scriptum reliquit vid. p. 786. Adsentitur huic *Hildanus centur. 6. obs. 84.* Vomitorium principio podagræ datum omnem dolorem absumere legimus. Ipse quoq; Dn. Præsi. in notis ad Poterium scripsit, in principio exhibitum vomitorium impetum arthritidis retudisse, idemque altero die repetitum similem effectum præstitisse. *Alpinus in Medicina Æ*

gyptiorum p. 110. observat, multos se vidisse, qui cum a podagra calculique doloribus excruciatii fuissent, crebro usu vomitorii egregie adjuti fuerint.

§. XXIV.

Solent etiam ab iracundia multa atque graviora mala oriri, non alia de causa, quam quod bilis copiose in duodenum ex ductibus biliariis effusa, genus nervosum membranasque graviter adficiat, multa inde mala excitando. Si enim nimium redundat bilis, neque per alvum neque per vomitum rejecta, multas creat anxietates, oris amororem, nauseam vomendique conatum & alia mala. Igitur profunt in hoc adfectu absorbentia, rhabarbarina, leniora laxantia & emetica, spirituosius salibus volatilibus infusisq; calidis diligenter evitatis.

§. XXV.

Erysipelas variolæ hæmorrhagiæ aphthæ diarrhœæ, adfectus hypochondriaci & hysterici febres malignæ petechiales eandem sedem adgnoscent, duodenum nempe, siquidem in hoc ex bile lymphæque putridæ stagnatione oriuntur. Unde & illud fluit in praxin, primæ regionis rationem maxime habendam esse. Quod argumentum cum latius uberiusque complexus sit Dn. Præses in dissertatione de bile medicina & veneno corporis, nos brevitati consulturi, ampliori explicationi supersedemus, ad illam dissertationem lectorem remittentes.

§. XXVI.

Quod praxin & viam medendi attinet morborum, qui in duodeno & prima regione sedem fixerunt, facile ex dictis apparet, emetica diligenter præparata & prudenter exhibita hisce morbis unice auxiliari. Emetica sunt generosa & valida remedia, quorum virtus fere

omnibus reliquis medicamentis præferenda. Et si medicus solidi quid præstare potest, certe emeticis id præstare potest. Sæpe enim unico remedio magnus tollitur in principio morbus, & qui emeticis non utitur, nec iis recte uti novit, ille nostra quidem sententia veræ praxeos ignarus est. Opus est vero emeticis, si ventriculus & duodenum impuris humoribus scatent, ut statim in limine materia peccans ejiciatur. Perniciosum enim est, per tam longum intestinorum canalem & per inferiora evehere, cum ad sanguinis massam facilius pertransire possit. Et quod maximum est, purgantia pleraque materiam, in ventriculo & duodeno stagnantem non agrediuntur nec commovent, nec provoment; sed in hisce partibus parum operationis exercent magis intestina tenuia excitando. Ratio ex ipsis anatomicis potest peti. Gaudet, uti notum est, ventriculus & duodenum crusta glandulosa, sub qua nervea jacet, per hanc minus penetrare purgantium spicula possunt & nerveam pungere, utpote quæ fixioris & minus vehementis sunt indolis. Melius autem ipsam emetica stimulant, quæ sunt penetrantioris & agilioris ingenii. Præferimus tamen semper liquida solidis, utpote quæ non in una parte ventriculi hærent, sed ubique æqualiter sese diffundunt, & propter virtutem suam facilius & majori cum euphoria operantur. Secundo commendamus in morbis qui duodeno & intestinis insident ea omnia, quæ tonum roborant, motum peristalticum conservant, tonum labefactum adaugent & sic alvum solutiorem præstant. Hujus generis sunt salia deterfiva v. g. arcan. dupl. terra foliat. tartari, it. medicamenta amara cum temperatis gummatibus & resinis mixta, rhabarbarina, succinata, myrrhata

rhata, aloetica. Qui enim curare morbos chronicos & eos qui in primis viis fiunt, avertere tentat, hic ante omnia motum peristalticum respicere debet, quo salvo, quod patet ex alvi debito officio, cetera facilius subiguntur. Deinceps ad morbos in duodeno subortos, eliminandos maximi facimus absorbentia & præcipitantia, quæ acorem atq; acrimoniam infringunt: horum usus certe maximus in medicina. Si fuerit bilis nimis calida, acris, volatilis, nitrosa acidula præsentissima remedia, quæ eam corrigunt emendantq;. Eadem si iners si nimis viscida est, elixiriis amaris balsamicis restitui debet.

§. XXVII.

Ultimo sciendum est, iis in morbis, quorum causa delitescit in prima regione, quæ impuris multis humoribus repleta, minus quadrare sudorifera, calidiora, & salia volatilia, utpote hæc ipsa non tantum materiam peccantem magis attenuant, sed & in massam sanguinis & humorum nocentissime inferunt; cum tamen potius per superiora & inferiora eliminanda sit. Placet mihi locus Sylvii Prax. med. p. 445. Quodocunque prima regio scatet impuris humoribus sudorifera non sunt adhibenda, quia sudor non excitatur nisi sanguine commoto universo, qui tunc quoque solito fit fluidior, unde cum ipso, quævis sanguini admixta. Peccatur hac in re toto die, dum ante evacuationem primarum viarum calida propinantur, præsertim sudorifera cum regimine. Denique improbamus & illud, quod prima regione impuris humoribus repleta, multi anodyna adhibeant, cum tamen in tali casu illa perniciosissima. Nam materiam

nocentem in centro tenent, quæ tamen erat evacuanda;
Tertio illud maxime tenendum, quod, si materia pec-
cans in primis viis latens, jam ad massam sanguine-
am atque ad ipsum habitum corporis transiit, sicuti
in erysipelate variolis, arthritide accidit tunc caute
adhibenda emetica, quæ materiam à peripheria ad
centrum trahendo graves affectus, convulsionones & gravia
symptomata excitare possunt. Ideo hisce tunc abstinен-
dum est, & abstersivis lenioribus vel etiam clysteri-
bus utendum, illis potius in initio morbi
& extra paroxysmum locum
habentibus.

S. D. G.



NOBILISSIMO DN. CANDIDATO

S. P. D.

FRIDERICUS HOFFMANNUS, Præses.

PRaxin medicam nec sine theoria, nec theoriam solidam sine praxi consistere posse, dudum à medicorum sapientibus proditum est. Unde talem theoriam maxime praxi existimo profuturam, quæ ex claris & perspicuis principiis omnium effectuum, qui fiunt in corpore humano, causas deducit, & quid, & quibus instrumentis & quo tempore agendum sit, demonstrat. Neq; tamen hæc obvia vel cuique exposita, sed ex aliis scientiis, physica nempe, chymia, mechanica, corporisque humani anatomia acquiritur. Hæ sunt illæ scientiæ, quæ maxime instruunt rationem & intellectum medentis, ut deinde in praxi omnia faciat cum ratione & cum demonstratione. Talis theoria fuit mihi semper ante oculos, imo curæ cordique, quamdiu professorio perfunctus sum munere.

Hanc theoriam iis, qui meæ sese tradiderunt doctrinæ, hætenus inculcavi, in usum certe nunquam poenitendum. Ingenue enim fateor, me
semper

semper in ea fuisse opinione, quod qui non tinctus
sit anatomica & physica scientia, miser coecusq;
sit medicus. TU NOBILISSIME DN. CANDIDATE,
sollicite hæc semper agitasti, quæ ad perficiendum
medicum practicum pertinent. Tu non modo
in saniori theoria, sed & in solida praxi posuisti
fundamenta egregia. Nihil est reliquum, quam ut
ea, quæ in Academia sedulo didicisti, in effectum de-
ducas & in mortalium usus & fructus solidæ theo-
riæ applies. Laudo denique pulcherrimum tuum
institutum, quod dissertationem hanc celeberrimo
Silesiorum Practico, Viro inscripseris cordatissi-
mo, hunc Tibi colendum, hunc imitandum etiam
propono. Duce enim semper & Doctore, si
praxin ingredimur, fideli opus est. De cetero
Tibi Vir Clarissime ex animo gratulor de ingenii
tui dotibus, eximiisque candoris & modestiæ
virtutibus: gratulor quoque de honoribus, qui-
bus proxime condecoraberis. DEUS bona a-
nimi, quæ in Te emicant, augeat, fortunet, idem-
que det, ut quos hic collegisti fructus in patriæ
sinum olim uberrimo effundas foenore, mor-
taliū saluti inferviturus. Vale! Halæ ipsis Non.
Januar. MDCCVIII.

